

आकाशवाणी जयपुर–अजमेर प्रादेशिक समाचार

दिनांक 22.05.2024

समय: 18.45 बजे

- प्रदेश मांय पड रही जबरदस्त गर्मी ऊं जिन्दगी माथे घणो असर पड़्यो–बाड़मेर मांय पारो 48 डिग्री सेल्सियस ताई चढ़्यो–घणखर जिलां मांय आवता तीन दिन लू बाजण सारू चेतायी ज्यो ।
- जोरदार गर्मी अर लू ने ध्यान राखता थकां संभागीय आयुक्त, जिला कलेक्टर अर उपखण्ड अधिकारी स्तर रा अहलकारां री छुट्टियां रद्द करी ज्यी –अहलकारां ने मुख्यालय माथे रेहवण रा हुकम ।
- चुनाव आयोग राजस्थान अधीनस्थ कर्मचारी चयन बोर्ड ने सात भर्ती परीक्षावां रा नतीजा जारी करण री मंजूरी दीनी ।
- राज्य रा न्यारा–न्यारा वन्यजीव अभ्यारण्यां मांय काल वाटर हॉल पद्धति ऊं जिनावरां री गिणती करी जावेला ।

प्रदेश रा घणखर हलकां मांय आज ई ज़ोरदार तावड़ो पड़्यो अर लू बाजी। मौसम विभाग ऊं मिली जाणकारी रे मुजब आज प्रदेश मांय सब ऊं बत्तो 48.0 डिग्री सेल्सियस तापमान बाड़मेर मांय दर्ज करी ज्यो। फलौदी मांय 47 दशमलव 8, चूरू मांय 47 दशमलव 4, जैसलमेर मांय 47 दशमलव 2 पिलानी मांय 46 दशमलव 8 अर श्रीगंगानगर मांय 46 दशमलव 7 डिग्री सेल्सियस तापमान दर्ज करी ज्यो। प्रदेश मांय पड़ रह्या जबरदस्त तावड़ा ने ध्यान राखता थकां राज्य सरकार संभागीय आयुक्तां, जिला कलेक्टरां, अतिरिक्त जिला कलेक्टरां अर उपखंड अधिकारियां री छुट्टियां अर मुख्यालय छोड़बा री मंजूरी निरस्त कर दीनी है। कार्मिक विभाग रा संयुक्त शासन सचिव ऐड़ा हुकम जारी कीना है। म्हाणा खबरनवीस बतायो के प्रदेश मांय दिन अर रात री बगत तापमान सामान्य ऊं पांच ऊं आठ डिग्री सेल्सियस ऊंचो दर्ज करी ज्यो। पेश है

प्रदेश रा सरहदी जिलां मांय ई घणो ज़ोरदार तावड़ो पड़ रह्यो है। जैसलमेर मांय जनता ने गर्मी ऊं बचावण सारू नगर परिषद री ओर ऊं न्यारा-न्यारा जतन कर्या जा रह्या है। शहर मांय सोनार किला समेत न्यारी-न्यारी ठौड़ां छाया सारू तम्बू ताणी ज्या है। बाड़मेर मांय ई घणी ज़ोरदार गर्मी पड़ रही है। म्हाणा खबरनवीस बतायो के वटे गर्मी ऊं मिनखां सागे जीव जनावर ई परेशान व्हे रह्या है।

प्रदेश रा ऊगणी हलकां मांय ई पारो घणो चढ ग्यो है। म्हाणा सवाई माधोपुर खबरनवीस बतायो के ज़बरदस्त गर्मी रे कारण जिन्दगी माथे घणो असर पड़ रह्यो है।

भरतपुर मांय पड़ रही ज़ोरदार गर्मी ने ध्यान राखता थकां आर.बी.एम. अर जनाना अस्पताल परिसर मांय पाणी रो छिड़काव करायी ज्यो। नगर

निगम री ओर ऊं सडकां माथे ई पाणी री छिडकाव करायी ज्यो।
ढांढां—ढोरां अर परिन्दां सारू ई दाणा पाणी री व्यवस्था करी ज्यी है।
मौसम केंद्र जयपुर आवता तीन दिन प्रदेश रा घणखर हलकां मांय पारो
और चढबा री शंका जतायी है। केंद्र रा निदेशक राधेश्याम शर्मा बतायो
के आवता तीन दिन मांय कटे—कटे पारो 48 डिग्री सेल्सियस ताई पूग
जावण रा आसार है।

000

चुनाव आयोग राजस्थान अधीनस्थ कर्मचारी चयन बोर्ड ने सात भर्ती
परीक्षावां रा नतीजा जारी करण री मंजूरी दे दीनी है। आं भर्ती परीक्षावां
मांय सूचना सहायक, ए.एन.एम., जी.एन.एम., कृषि पर्यवेक्षक, कनिष्ठ
लेखाकार अर तहसील राजस्व संगणक अर सी.एच.ओ. री परीक्षा शामिल
हैं। आं भर्ती परीक्षावां रा नतीजा ई महीना रा आखिर ताई ऐलाण कर्या
जावण री संभावना है। अ इम्तिहान 17 हजार ऊं बत्ता ओहदां सारू
लिया ज्यो हा, ज्यां सारू सात लाख ऊं बत्ता उम्मीदवार अर्जियां दीनी
ही।

000

लोकसभा चुनाव रा 25 मई ने व्हेवण वाळा छठा दौर सारू प्रचार पूरा
जोर—शोर ऊं चाल रह्यो है। ई दौर सारू प्रचार रो काम काल सिंज्यां
पूरो व्हे जावेला। चुनाव रा सातवां अर आखिरी दौर सारू एक जून ने
पडबा वाळा वोटों सारू ई प्रचार जोर पकड़ रह्यो है। चुणाव रा सातवां
दौर मांय आठ राज्यां अर केन्द्र रा राज वाळां एक प्रदेश मांय नौ सौ
चार उम्मीदवार चुनाव मैदान मांय है।

चुनाव रा आखिरी दौर मांय उत्तर प्रदेश अर पंजाब री 13—13, पश्चिम
बंगाल री नौ, बिहार री आठ, ओडिसा री छह, हिमाचल प्रदेश री चार,
झारखंड री तीन अर केंद्र रा राज वाळा प्रदेश चंडीगढ़ री एक सीट माथे
चुणाव सारू वोट वोट पड़ेला। वोटों री गिणती चार जून ने करी
जावेला।

000

निर्वाचन आयोग भारतीय जनता पार्टी रा अध्यक्ष जे.पी. नड्डा अर कांग्रेस रा अध्यक्ष मल्लिकार्जुन खड़गे ने पार्टी रा खास प्रचारकां ने चुणाव आदर्श आचार संहिता रा उल्लंघन करण वाळा बयान देवण ऊं बचबा सारू औपचारिक नोट जारी करण बाबत् कह्यो है। आयोग नड्डा ऊं वां री पार्टी रा प्रमुख प्रचारकां ने समाज ने बांटण वाळा भाषण देवण ऊं बचबा बाबत् केहवण सारू कह्यो। आयोग कांग्रेस रा खास प्रचारकां ने प्रचार रे दौरान भाषण मांय फौज रो नाम नी लेवण बाबत् कह्यो। आयोग खड़गे ने पार्टी रा खास प्रचारकां कानी ऊं देश रो संविधान खत्म करण री बात वाळा भाषण देवण ऊं रोकण बाबत् कह्यो।

000

सीकर मांय लोकसभा चुनाव रा तैत स्वीप गतिविधियां रे मार्फत एके सागे 9 लाख 16 हजार मतदातावां कानी ऊं वोट देवण री शपथ लेवण रो वाकयो वर्ल्ड बुक ऑफ रिकॉर्ड्स लंदन मांय दर्ज करी ज्यो है। वर्ल्ड बुक ऑफ रिकॉर्ड्स लंदन रा नुमाइन्दा जिला निर्वाचन अधिकारी अर कलेक्टर कमर उल जमान चौधरी ने ई रो फाइनल सर्टिफिकेट संप्यो। ध्यानजोग है के सीकर लोकसभा हलका मांय वोट पड़बा ऊं पैली 16 अप्रैल ने एके सागे 9 लाख 16 हजार लोग वोट देवण री सौगंध लीनी ही।

000

लोकसभा चुनाव मांय पड़्या वोटों री 4 जून ने करी जावण वाळी गिणती सारू प्रदेश मांय ई कर्मचारियां ने सिखावण दी जा रही है। श्रीगंगानगर मांय एम.डी. बी.एड. कॉलेज मांय सिखावण दीरीजी। ई दौरान वोटों री गिणती री बगत भर्या जावण वाळा न्यारा—न्यारा फॉर्म अर ईवीएम ऊं जुडी सिखावण दीरीजी।

000

राज्य रा न्यारा—न्यारा वन्यजीव अभ्यारण्यां मांय काल वाटर हॉल पद्धति ऊं जिनावरां री गिणती करी जावेला। चित्तौडगढ़ जिला रा सीतामाता सेंक्चुरी, बस्सी सेंक्चुरी, टेरीटोरियल एरिया अर मृग वन मांय वाटर होल तरीका ऊं जंगली जिनावरां री गिणती करी जावेला। ई सारू अभ्यारण्यां मांय 177 वॉटर होल अर आरे—सारे मचान बणायी ज्यो है। जिनावरां री गिणती काल संवारे 08:00 बज्यां ऊं 24 घंटा ताई चालेला। ई सारू ट्रैप

कैमरा ई लगायी ज्या है। जैसलमेर ज़िला रा मरू उद्यान केंद्र रा डीएनपी हलका मांय ई जिनावरां री गिणती सारू 44 वाटर प्वाइंट बणायी ज्या है।

000

अंतर्राष्ट्रीय जैव विविधता दिवस रे मौके आज प्रदेश मांय केई कार्यक्रम राखी ज्या। **सवाईमाधोपुर** मांय जिला विधिक सेवा प्राधिकरण री ओर ऊं जागरूकता रैली निकाळी ज्यी। ई सागे ई पर्यावरण ने बचावण अर बधावो देवण सारू जाग जगावण बाबत् पावरपॉइंट प्रजेंटेशन ई दियो ज्यो। **भरतपुर** रा महारानी श्री जया कॉलेज मांय वनस्पति विज्ञान विभाग री ओर ऊं संगोष्ठी राखी ज्यी। पर्यावरण ने बचावण सारू बत्ता ऊं बत्ता पौधा रोपण रा संदेश सागे कॉलेज मांय पौधा रोपी ज्या। **पाली** ज़िला रा घाणेराव सादड़ी मांय बच्चां सारू चार्ट बणावण, निबंध लिखण अर भाषण देवण री होड़ां राखी ज्यी।

000

कोटा री संभागीय आयुक्त उर्मिला राजौरिया आज बूंदी ज़िला मांय लाखेरी रो दौरो कीनो। वे सामुदायिक स्वास्थ्य केन्द्र मांय जनता ने मुहैया करायी जा रह्या सुबीतां अर व्यवस्थावां ने और बेहतर बणावण रा हुकम दीना। वे अस्पताल मांय सफाई रो खास ध्यान राखण अर उनाळा मांय लू ऊं बचाव ऊं जुड़्या सगळा बन्दोबस्त करण अर जनता ने लू ऊं बचाव ऊं जुडी जाणकारी देवण बाबत् कह्यो। संभागीय आयुक्त लबान गांव मांय मनरेगा रा तैत चाल रह्या कमठाणा रो ई दौरो कीनो। वे काम री ठौड मजूरां सारू पीवण रा पाणी अर दवाइयां रा बारा मांय ई जाणकारी लीनी अर जरूरी हुकम दीना। जोधपुर रा सम्भागीय आयुक्त बी एल मेहरा आज जैसलमेर रा सरकारी जवाहर अस्पताल रो दौरो कर र मुफ्त दवा केंद्रां, वार्डा अर सफाई व्यवस्था ऊं जुड़्या इन्तजामात देख्या अर अहलकारां ने जरूरी हुकम दीना। **पाली** रा ज़िला कलेक्टर लक्ष्मीनारायण मंत्री ई सांडेराव मांय राजकीय सामुदायिक स्वास्थ्य केंद्र रो दौरो कर र व्यवस्थावां रो जायजो लीनो अर जरूरी हुकम दीना। वे सुमेरपुर ब्लॉक रा तख्तगढ कने ढोलियों का बास मांय गैर कानूनी तौर ऊं लगायी ज्यी पाणी खींचण री दो मशीनां जब्त कर र अहलकारां

जरूरी कार्रवाही रा हुकम ई दीना। **भीलवाड़ा** रा ज़िला कलेक्टर नमित मेहता आज गुलाबपुरा उपखंड मुख्यालय अर हुरडा गांव रो दौरा कर र पीवण रा पाणी री पूर्ति तैय करण अर अस्पतालां मांय मरीजां ने जरूरी सुबीता मुहैया करावण रा हुकम दीना।

कोटपुतली—बहरोड़ री ज़िला कलेक्टर कल्पना अग्रवाल नीमराना रा जोनायचा खुर्द मांय रात्रि चौपाल लगा र गांव वाळां री परेशानियां सुणी अर अहलकारां ने जरूरी हुकम दीना। **बांसवाड़ा** रा अपर जिला न्यायाधीश जेल रो दौरा कर र व्यवस्थावां रो जायजो लीनो।